



Atur Sembiang Spiritual Communion

(Ke Raban Mit & Ruang Bilik)

***Penerang:** Lebuah kitai enda ulih besembiang Eukarista ketegal penanggul ti enda ulih diseliahka kitai, Sembiang Spiritual Communion tu ulih dikena kitai nganti Sembiang Eukarista enggau nerima pengasih sereta berekat ari Allah Taala. Tang atur sembiang tu enda ulih dikena enti paderi bisi lalu ulih nyedia sereta mela sakramen. Atur sembiang tu tau diuluka tuai ruang bilik tauka barang sapa orang ke ulih.*

LAGU TAUKA PANTUN TAU DINYANYI

Tauka diau jenuh enda lama

Ketuai: Allah Taala ti pepadu bekuasa, Apai kami ti di serega, seharitu kami begempuru besampi di mua Nuan lalu enggau ati ti baruh kami muji Nuan ketegal sapa Nuan enggau ke semua utai ti udah digaga Nuan dalam pengidup kami. Kami beterima kasih sereta muji Nuan ke pemesai pengerindu Nuan, ti alai Nuan enda ngalau Anak Nuan, tang ngirumka Iya nyadi Anak Domba Nuan ti mati nyadi Piring lalu nebus kami ari dosa kami. Ulih Jesus Kristus Tuhan Kami.

Semua: **Amin.**

Ketuai: Puji ke Allah Taala, + Apai, Anak, enggau Roh Kudus. Lalu puji mega ka Perintah Iya, diatu enggau belama-lama iya.

Semua: **Amin.**

Ketuai: Awakka kuasa Roh Kudus nurun atas kami, O Tuhan, ngambika Iya nuchi ati kami ngena pengasih lalu ngelindung kami ari semua penusah; ulih Kristus Tuhan kami.

Semua: **Amin.**

Ketuai: Apai ti pepadu bekuasa, terima kasih ke Anak Nuan Jesus Kristus ti meri kami jaku munyi tu:

“Dinga nuan, Aku berdiri di mua pintu lalu nekung. Enti orang ninga nyawa Aku lalu muka pintu, Aku deka tama lalu makai enggau iya, lalu iya deka makai enggau Aku” (Pemandang 3:20).

“Aku tu pun anggur, kita nya dan. Orang ke meruan dalam Aku, lalu Aku meruan dalam sida, deka bebuah lebat, laban enti nadai Aku, kita enda ulih ngereja sebarang utai” (John 15:5).

Kami mega beterima kasih ke pemanah enggau pengasih Nuan laban,

“Nuan nyendiaka pengerami makai besai ke aku di mua munsuh aku. Nuan nata pala aku ngena minyak lalu ngisi jalung aku penuh. Aku nemu, pemanah enggau pengerindu Nuan deka meruan enggau aku sepemanjai umur aku. Lalu aku deka diau dalam rumah TUHAN belama lama iya.” (Masmur 23:5-6).

Semua: **Amin.**

BACHA ARI BUP KUDUS

Injil ti dibacha diambi ari Leksyenari ke Hari Minggu nya. Bacha ari Penyanggup Lama enggau Epistola ti diletak ka Hari Minggu nya mega tau dibacha.

JAKU AJAR

Udah Injil dibaca, kita tau belematika Jaku Tuhan ti dibacha, tauka mendingka jaku ajar ti direkod ke Hari Minggu nya.

BATANG PENGARAP RASUL

Semua: Kami ARAPKA Allah Taala, Apai ti pepadu bekuasa, Pengaga langit enggau bumi.

Kami arap ke Jesus Kristus, Anak Tunggal Iya, Tuhan kitai; Iya dikandung ulih kuasa Roh Kudus; diadaka Maria dara tuchi; Iya merinsa maya Pontius Pilate; Iya diregang, lalu mati, lalu dikubur; Iya nurun ke dunya pemat; Hari ketiga Iya pulai idup baru; Iya pulai ke serega; Iya duduk puak kanan Allah Apai ti pepadu bekuasa; Ari nyin Iya ka datai baru, ka nembuka pechara mensia, orang ti idup enggau ti mati.

Kami arap ke Roh Kudus, ke Gerija Katolika ti kudus, ke penyerakup semua orang tuchi; ke Pengampun Dosa; ke Pengangkat tubuh ari mati; ke Idup Meruan. Amin.

SAMPI PINTA

Ngena jaku nuan empu, besampi ke gerija enggau ke dunya, sereta ke utai ti dipegunaka nuan enggau ke orang bukai.

PENGESAL ATI

Semua: Allah Taala, kami amat ngesal ati ke dosa ti udah digaga kami ngelaban Nuan, ke semua penyalah ti udah dikereja kami, enggau ke pemanah ti enda dikereja kami. Ampun kami ketegal Jesus, sereta beri kami pengering enggau penemu dalam dikena kami ngubah pengidup kami. Amin.

NERIMA SPIRITUAL COMMUNION

Ketuai: Dalam penyerakup, O Tuhan Jesus, kami sama enggau semua orang ti taluk seharitu begempuru ba tiap iti altar gerija Nuan ti alai Tubuh enggau Darah Nuan ti berega dijenjuk. Kami ngingatka parish kami _____ (nama Parish) enggau semua raban iya, lalu kami amat keran ati deka meri Nuan puji enggau terima kasih ke Nuan ti udah ngaga kami enggau merekatka pengidup kami. Kami mega berterima kasih sereta muji Nuan ke udah ngelepaska kami nengah pengidup, pemat enggau pengangkat Nuan. Terima kasih laban nya meh jalai kami bulih pengasih enggau pengadang.

Ngenang berekat ti diberi Nuan ke kami _____ (sebut berekat nya), kami pechaya Nuan endang bisi ba Sakramen kudus nya, lalu taja pen kami diatu enda ulih nerima Sakramen nya, kami besampi minta Nuan datai lalu diau dalam ati kami. Diatu kami nyatuka kami enggau Nuan sereta bepegai ba Nuan enggau pengabis ati, roh enggau runding kami. Saup kami ngambika nadai utai di dunya tu ulih nyerara kami ari Nuan. Kami besampi ngambika kami terus mela Nuan, dataika maya kami udah begulai enggau Nuan, ulih pengasih Nuan, di Perintah Nuan ti bemulia.

Ulih Jesus Kristus Tuhan kami.

Semua: Amin.

SAMPI TI DIAJAR TUHAN JESUS

Diau jenuh enda lama belematika pengerindu Allah Taala ti udah nganjung Anak Tunggal Iya ngagai dunya ketegal nuan. Uдах nya sebut sampi ke diajar Tuhan Jesus.

Ketuai: Laban Penebus kitai udah ngajar kitai, nya alai kitai nyebut.

Semua: **Apai kami di serega; Kudus mih nama Nuan, datai mih perintah Nuan, jadi mih peneka Nuan, baka dalam serega baka nya di dunya. Beri ke kami pengidup tiap hari, ampun penyalah kami baka kami ngampun orang ti salah ngelaban kami. Intu kami ari penguji. Lepaska kami ari penyai. Kra, Nuan ti bempu perintah enggau kuasa, enggau mulia, datai ke belama-lama iya. Amin.**

SAMPI PENUTUP

Ketuai: Datai mih Tuhan Jesus, lalu diau dalam ati kami enggau pengabis pengering Nuan; lalu awakka Nuan nyadi pun penemu dalam kami lalu ngiring kami ngagai jalai ti bendar; lalu awakka pengidup kami enggau kereja kami neladan pengudus Nuan; lalu awakka pengasih kuasa Nuan bekuasa atas kuasa jai ti tau ngerusak pemansang perintah Nuan, laban Nuan enggau Allah Apai enggau Roh Kudus endang Allah Taala ti siku, ti idup sereta merintah dalam mulia ti meruan belama-lama iya.

Semua: Amin.

Semua: **Awakka pengasih Tuhan Jesus Kristus kitai, enggau pengerindu Allah Taala, enggau kaul Roh Kudus meruan enggau kitai semua. Amin.**